



धोरा धरती राजस्थान रा लिछमी-पुत्र



श्री जुगलकिशोर बिड़ला



श्री हनुमानप्रसाद पोद्दार




श्री कमलापत सिंघानिया



श्री घनश्यामदास बिड़ला



श्री जमनालाल बजाज



श्री प्रभुदयाल हिम्मतसिंहका




श्री साहू शांतिप्रसाद जैन



श्री आनंदीलाल पोद्दार



श्री मंगतूराम जैपुरिया



श्री सीताराम सेक्सरिया



श्री भागीरथ कानोडिया



श्री राम मनोहर लोहिया

— डॉ. सोहनराज तातेड़

देश-विदेश मांय उद्योग-व्यवसायां रे पाण नीं जाणै किता धोरा धरती रा लिछमी पुत्र राजस्थान रौ नांव ऊंचौ कर्यौ! दरअसल राजस्थान रा जाया-जलम्या अर राजस्थान मूळ रा वौपारियां री औद्योगिक साहसिकता जग-चावी है। देश रा सगळ प्रांतां अर केई बारला देश में वौपार में आगीवाण हुवण अर औद्योगिक इकाइयां री थापना रौ जस इणी समुदाय नै है। छोटी-छोटी गद्दियां सूं सरू करीजी इणां री व्यावसायिक जात्रा देश रे निजी छेत्र रा आधै सूं बेसी आरथिक साधनां माथै आधिपत्य जमावती थकी अंतरराष्ट्रीय स्तर ताई जाय पूगी है। भारत रे आरथिक इतिहास मांय तौ इणां नवा कीरतमान थापन कर्या ई है, साथै ई इण परंपरागत उद्योगां सूं परिष्कृत उद्योगां मांय प्रवेस कर रे अमेरिका, इंग्लैंड, जापान, आस्ट्रेलिया, जर्मनी अर केई यूरोपीय देसां रे बजारां मांय थरपित हुय चुक्या है। इण भांत राजस्थान रा लिछमी-पुत्रां री धाक आज आखै देश मांय ई नीं, आखी दुनिया मांय है। अई बात नीं है के देश रे दूजै प्रदेश मांय अथवा विदेशां मांय व्यवसायी जातियां पैदा नीं हुवती हुवै, पण राजस्थान री व्यवसायी जातियां री आपरी न्यारी निकेवळी जैविक खासियतां है अर वां खासियतां रे पाण ई वै आपरी सफळतावां रा झंडा दुनिया भर मांय गाड्या है। राजस्थान रे लिछमी-पुत्रां री व्यावसायिक प्रतिभा सौ बरसां पैला जाब चार्नेक रे इण सबदां में उजागर हुयी— “हिंदुस्तान मांय अेक मारवाडी जाति इज अैडी है, जिकी दूजी सगळी ई जातियां री तुलना में वाणिज्य-वौपार मांय खास दक्ष अर ईमानदार है। कंपनी (ईस्ट इंडिया कंपनी) चावै तौ मारवाडी जाति रौ सैयोग प्राप्त कर रे आपरै वौपार रौ बेसी सूं बेसी फैलाव कर सकै!” उल्लेखजोग बात आ है के ‘ईस्ट इंडिया कंपनी’ इणी मारवाडी प्रतिभा रौ उपयोग करती थकी आपरौ व्यवसाय पूरै देश मांय फैलायौ।

भारत रै मानचित्र मुजब जे भारतमाता रै सरूप री कल्पना करां तौ राजस्थान हिबडै रै हार जिसौ लखावै। हिम मंडित मुगत अर पग पखाळतै सागर रै बिचाळै राजस्थान री वीरप्रसू धरा सही रूप में भारतमाता री हिरदैस्थळी-सी लागै। प्राचीन काल सूं लगायनै आज दिन ताई आ धरती भारतीय संस्कृति री ठावी ठौड़ रह्यो। संसार में अनेकू राज आया अर गया। केई धरम उग्या अर अस्त हुया। मोकळी संस्कृतियां बणी अर बिगड़ी, पण भारतीय संस्कृति रौ मूळ सरूप आज दिन ताई अठे सागण रूप में कायम रह्यो। इणरौ मूळ कारण इण संस्कृति सागै इण धरती री वै खूबियां है, जिकौ मानव मात्र रै कल्याण री कामना करै अर मानखै रै उदात्त चरित्र रौ निरमाण करै।

इणी सबळी अर सोवणी संस्कृति रा दरसण परतख रूप में आज ताई अठे होवै। इणरै लारै भलां ई भांत-भांत रा भौगोलिक अर सामाजिक कारण रह्या हुवौ, पण आ बात सोळूं आना साची के भारतीय संस्कृति रा उदात्त गुण आज ई राजस्थानवासियां में बोहळई सूं देखण नै मिळै। मायडभोम खातर मर मिटण री कामना, प्राण देयनै ई वचनां री प्रतपाळणा, शरणागत री रक्षा, हिम्मत, गाढ, लगन अर ईमानदारी जिसा देव दुरलभ गुण अठे रा मानखै री रग-रग में समायोड़ा अर उणरै रगत रै कण-कण में रळियोड़ा है। इतिहास इण बात रौ साक्षी। अठै री नारी तौ भारतीयता री साक्षात् प्रतिमा। कवि रै सबदां में—
है सिंघणियां आज लग, निरवीजां घर नांह।
वंस उजाळक बाहुडी, मिळै झुंपड़ां मांह ॥

कठोर जीवन अक वरदान

इण प्रदेश रौ घणकरौ भाग मरुस्थळी होवण सूं दूजै भारतीय प्रदेशां सूं अठै रौ जीवण न्यारी निरवाळौ। च्यारूमर फैल्योड़ा मोटा-मोटा धोरा, पाणी रौ तोड़ौ, आवागमन रै साधनां री अबखाई, हर बरस दुकाळ री मंडरावती काळी छिया अर पेट-भराई रै साधनां रौ अंगां ई अभाव। इण कारणां सूं अठै रौ जीवण घणौ अबखौ, घणौ कठोर। दुरगम मरुस्थळी भू-भाग क पहाड़ी इलाकौ होवण रै कारण औ प्रदेश ठेट सूं मुल्क रै दूजै भागां सूं कट्योड़ौ न्यारी ई रह्यो। जैसलमेर जिसौ इलाकौ तौ उण वखत इतरौ अडवेळौ अर दुरगम गिणीजतौ के उठै ताई पूगणौ ई घणौ अबखौ काम मानीजतौ। कवि रै सबदां में—
घोड़ा जे व्है काठ रा, पिंड कीजै पाषाण।
लोह तणा व्है लूघड़ा, जद देखीजै जैसाण ॥



डॉ. सोहनराज तातेड़

जैसलमेर देखण वास्तै साधारण सरिर सूं पूगणौ ई असंभव गिणीजतौ। उण वास्तै लकड़ी रै घोड़ै, पत्थर जिसै कठोर सरिर अर लोह सूं बणी पोसाक री जरूरत महसूस करीजती।

दूजी सुख-सुविधावां री तौ खैर बात छोड़ौ, पण जठै पीवण रौ पाणी ई दोरौ हाथ आवतौ, उठै री अबखाइयां रौ अंदाज सहज ई लगायौ जाय सकै। उन्हाळै में खैखड़ करती लूवां अर तवै रै उनमान तप्योड़ी धरती। हरियाळी रा कठैई दरसण ई नीं। सैकड़ां कोसां ताई पसर्योड़ौ मरुस्थळ अर उणमें अळगा-अळगा बस्योड़ा नेना-मोटा गांवड़ा अर ढाणियां। आवागमन रौ से सूं तेज साधन ऊंठ, जिकौ खेती, सवारी अर माल लादण जिसै सगळै कामां में काम आवतौ।

इसौ अबखौ जीवण देख रै लागै जाणै अठै रैय रै किंया ई मिनखाजूण पूरी करणी है। दिन थोकडै देवणा है अर पशुवत् जीवण बितावणा है।

राजस्थान रै लिछमी-पुत्रां री सफळता रै लारै अप्रतख रूप सूं परंपरागत सामाजिक अर सांस्कृतिक मूल्य रैया। खास सामाजिक मूल्यां रै कारण इणां री दिनचर्या नियमित हुवती। अै सजातीय भाइयां री हरसंभव सहायता करता। आं रौ वैवार संयत अर दैनिक जीवण मितव्ययी रैवतौ। केई पाश्चात्य विद्वान स्वीकार्यो है के सामाजिक व्यवस्था मारवाडियां री सफळता रौ आधार रैयी है। टिम्बर्ग रौ कैवणौ हौ के मारवाडियां रा खास गुण उणां नै आपस में सामाजिक सहायता देवण अर आरथिक मदद करण रै अलावा शिक्षा, मनोरंजन आद री सुविधावां ई आपरै सहकर्म वौपारियां अर समाज सारू जुटावण नै अभिप्रेरित कर्या। इणी वजै सूं वौपारिक घराणां नै आपरै समाज रै लोगां रौ चाईजतौ सैयोग अर सम्मान मिल्यो।

पण इण अबखाई रौ दूजी सबळी पक्ष है के अक कानी प्रकृति जठै कठोर अर क्रूर होवै, उठै रौ मानखौ बलिष्ठ, हिम्मतवर, गाढवाळौ अर कष्ट सहिष्णु होवै। उणमें उदात्त मानवीय गुण पुष्कळ रूप सूं मिळै। दूजी कानी जठै प्रकृति मेहरबान अर कृपाळू होवै, उठै रौ मानखौ आळसी, डरपोक अर कमजोर होवै। उणमें मानवीय गुणां री कमी निगै आवै।

औ ई कारण है के इण धरती में जायौ-जलम्यौ मिनख दुनिया रै कोई खुणें में गयो, छानौ कोनी रह्यो। आपरी मैणत, हिम्मत अर बहादुरी रै पाण वौ सदीव हरावळ में चालतौ निगै आयौ। उदाहरण सरूप राजस्थान रै शेखावाटी इलाकै नै लेवां। औ छेत्र मरुस्थळी अर अनुपजाऊ है, पण अठै जीवट री खेती पाकै। अठै का तौ माथौ कटाय रै मायडभोम री रक्षा करणिया वीर जनमै अर का विणज-वौपार में नांव उजागर करणिया लिछमी रा लाडेसर। इण धोरा धरती में जनम्योड़ा राजपूतां जुद्ध भोम में जूझ रै आपरी जौहर बतायौ तौ अठै रा वौपारियां आपरै बुद्धिबळ सूं देश री अलंघां पार मंडिया में पूग रै आपरी धाक जमाई। औ कुदरत रौ नेम है के जिण धरती में कीं नीं मिळै, उठै रौ मानखौ सै कीं लेवण री हिम्मत राखै। अभावां री उपलब्धि सूं अर विफळता रौ सफळता सूं वौ ई नातौ है जिकौ आवश्यकता रौ आविष्कार सूं है। इजरायल री मरुभोम रा यहूदी पूरे यूरोप अर अमेरिका माथे छायग्या तौ राजस्थान री मरुभोम रा वौपारी देश रै खुणै-खुणै अर आखी दुनिया में पूगग्या।

सैकड़ बरस पैला रौ प्रवास

आज देश रै मोटौ मोटै उद्योगपतियां में आधै सूं बेसी प्रवासी राजस्थानी है। मुल्क रै आधै सूं बेसी आर्थिक साधनां माथे वां रौ कब्जौ है। आपां सगळों रै वास्तै आ बात घणै गरब अर गुमेज री है। पण इण स्थिति में पूगण वास्तै कितरी पीढियां री हिम्मत, मैणत अर लगन काम आई, वा अक विचारणजोग बात है। आज देश में जिकौ नांवचीन उद्योगपति निजर आवै, वांरा दादा-पडदादा किण हालत में धोरा धरती सूं बारै निकळ्या होसी अर किण विकट परिस्थितियां में रैय रै वां विणज-वौपार करियो होसी, उणरी कल्पना ई आज नीं की जाय सकै।

आज सूं दो-तीन सौ बरसां पैली नीं तौ आपणै अठै रेलगाडियां ही अर नीं मोटरां। हवाई जहाज इत्याद री तौ कल्पना करणी ई बेकार ही। उण

हालात में ई राजस्थान रा वौपारी बंगाल सूँ लगायनै आसाम रै अबखै भाखरां ताई पूगया अर अठीनै अहमदाबाद-बंबई सूँ लगायनै धुर दक्खिन ताई फैलगया। कोई गांवडौं के कस्बौ इसौ नौं जठै नेनौ-मोटौ राजस्थानी वौपारी नौं लाधै।

जात्रा उण वखत ऊंट-घोड़ां माथै होवती या पैदल। रेलवे टेसण पकड़ण सारू केई दिनां ताई ऊंटं माथै बैठ र जात्रा करणी पड़ती। स्व. सेठ जी.डी. बिड़ला रा दादौसा शिवनारायणजी २३ बरस री उमर में जद पैलड़ी वळा बंबई गया तौ पिलाणी सूँ टेठ खंडवा ताई ऊंटं माथै गया हा। खंडवै पूगतां वानै पूरा बीस दिन लागया। उण जमानै में रेलवे लाईन खंडवा सूँ बंबई ताई बण्योड़ी ही। मारग में चार धाड़ियां रौ अणूंतौ डर रैवतौ इण वास्तै लोग गन्तव्य पूग र तीन-तीन, च्यार-च्यार बरसां री लांबी मुसाफरी करनै पाछा घरां आवता। टाबर-छोरुवां नै सागै लिजावण रौ सवाल ई नौं हौ। इण कारण कुटुंब-परिवार राजस्थान रै गांवां में रैवतौ अर खुद काळा कोसां दूर असेंधी धरती अर अणजाण बस्ती में दिन काटता। उण जमानै में डाक-टपाळ री ई कोई ढंगसर व्यवस्था नौं ही।

इण भांत अलेखूँ अबखाइयां ही, जिण रौ हिम्मत सूँ मुकाबलौ करनै राजस्थानी वौपारी समाज आगै बधियौ।

प्रवासी राजस्थानी जिण भांत आगै बधियौ इणरौ मूळ कारण इणरौ गुणवान अर चरित्रवान हुवणौ हौ। वौ जठै कठै ई गयो, उठै रौ ई बणग्यौ अर उण प्रदेश री तरक्की में दिलोजान सूँ सहयोग दियौ। वौ कठैई लोगां री आंख में घाल्यौ ई नौं खटक्यौ। आपरै उत्तम चारित्रिक गुणां रै कारण उणै सगळौ ठौड आपरौ सिक्कौ जमाय दियौ। आसाम-बंगाल में तौ उण जुग में 'मारवाड़ी बाबू' देवता रै उनमान पूजीज्यौ। उठै री प्रजा रौ उण माथै अणूंतौ विसवास हौ। कोर्ट-कचैड़ियां में उणरी साक्षी प्रामाणिक मानीजती अर खाली जबान माथै लाखां रौ विणज-वौपार चालतौ। आसाम में तौ आ हालत ही के उठै रा लोग उत्तराखंड री तीरथ जात्रा माथै जावता तद घर रा बूढा-ठाडा माईतां अर टाबरां नै मारवाड़ियां रै घरां में सूपनै जावता। वानै भरोसौ हौ के इण घरां में वारी पूरी देखभाळ होसी अर वां नै कोई तकलीफ नौं पड़सी।

विणज-वौपार रै मामलै में राजस्थानी कद सूँ बारै जावणा सरू हुया, इण बाबत विचार करां तौ

राजस्थानी उद्यमियां व्यावहारिक प्रशिक्षण माथै बेसी बळ दियौ। जिन्ना राजस्थानी सफल उद्यमी हुया है, उणां रै कनै प्रबंध री कोई उपाधि नौं ही, पण व्यवसाय रौ गैरी अनुभव हौ। आं लोगां में सरू सूँ ई आ परंपरा रैयी के टाबरां नै सै सूँ पैला गणित, बहीखाता, भाव-तोल अर पत्र-वैवार री शिक्षा दिरीजती। इण त्रै उणां रा टाबर गणित वगैरा में पारंगत हुय जावता। पछै बुजुरग उद्यमी उणां नै वौपारिक सूत्रां री मौखिक सीख देवता। अक बात माथै खास जोर दिरीजतौ के बिकवाळ री इच्छा सूँ माल खरीदणौ चाइजै अर खरीदार री गरज सूँ माल बेचणौ चाइजै। इण वौपारिक जाणकारी रौ इज परिणाम हौ के राजस्थानी वौपारी घणा पढ्या-लिख्या नौं हुवता थकां ई वौपार में प्रवीण बणग्या।

जाण पड़ै के आ परंपरा खासी जूनी है। सूखै प्रदेश में कमाई रा साधन नौं होवण सूँ हिम्मतवर राजस्थानी घणै पुराणै जमानै सूँ दूजै प्रांतां में आवता-जावता रह्या। इतिहास में इणरा दाखता टेठ मुगलकाल सूँ मिलै। अठारवीं सदी में जगत सेठ (मारवाड़ी ओसवाल) रौ परिवार बंगाल रै नवाबां अर नाजिमां रौ बैंकर हौ। औ घराणौ इतरौ प्रभावशाली हौ के इणरै इसारै माथै मुगल सम्राट गादी माथै बैठता अर उतरता जगतसेठ री ओटम सूँ। मारवाड़ रा दूजा निरा ई जैन परिवार बंगाल पूगा अर नवाबां री राजधानियां अर आजमगंज, जियागंज इत्याद बस्तियां में बसग्या। आज ई वै परिवार मारवाड़ी समाज में प्रमुख गिणीजै। उणां उठै मोटी-मोटी जागीरां खरीदली अर नवाबां रा बैंकर बण्या रह्या। प्रमुख इतिहासकार कर्नल टाड १८३२ में लिख्यौ है— "भारत में दस में सूँ नव बैंकर अर वौपारी मारवाड़ रा वासी है अर घणकरा जैन है।"

राजस्थानियां रौ घणौ प्रवसन अंगरेजां रै जमानै में हुयौ। १८५७ रा गदर रै बाद देस में रेल



अक्टूबर २०१७/माणक/१०

लाईणां रौ जाल-सो बिछ्यौ। इणसूँ देश रा प्रमुख नगर रेलमारग सूँ जुड़ग्या अर आवागमन सोरौ होयग्यौ। इण कारण राजस्थान सूँ बारै जावण री प्रक्रिया में १८६० सूँ लगायनै १९०० ताई खासी तेजी आई। गांवां सूँ लोगां रा टोळा रा टोळा कमाई वास्तै बारै जावण लाग्या। औ काम दूजै री मदद सूँ बेसी हुयौ। औ गांव, अक जात क अक इलाकै रा लोग बारै जायनै कठैई चाल पड़ग्या तौ उण लारला सैकड़ जणा नै खांच लिया।

वौपार रै छेत्र में

उण जमानै में बंबई अर कळकत्तौ मोटा बंदरगाह होवण सूँ वौपार रा प्रमुख ठिकाणा गिणीजता। इण कारण राजस्थानी प्रवासियां रौ प्रवसन इण दोनू नगरां कानी बेसी हुयौ। बीकानेर अर शेखावाटी रा घणकरा लोग आसाम-बंगाल कानी तौ मारवाड़-मेवाड़ रा लोग महाराष्ट्र अर मध्य भारत अर दक्खिन कानी। महाराष्ट्र अर मध्य प्रदेश में राजस्थानी पैली मराठां रा बैंकर अर वारी फौजां में ठेकेदार बण्या अर इणरै पछै वौपार रै छेत्र में आया। मराठां सूँ राजस्थानी वौपारियां रौ संपर्क वारै राजस्थान आक्रमण री वखत हुयौ होसी। महाराष्ट्र में राजस्थानियां नै गुजराती वौपारियां सूँ मुकाबलौ करणौ पड़्यौ। प्रामाणिक इतिहास सूँ जाणकारी मिळै के मध्य भारत में मारवाड़ी फर्मा १७८० रै पैली ई थापित होयगी ही। अक अंगरेज .जॉन मैलकॉम १८२९ में लिखै— "मध्य भारत रा सगळ् साहूकार अर सराफ घणकरा बाणिया है, जिकौ का तौ गुजराती है अर का मारवाड़ी।"

माळवै में अमल (अफीम) री खेती परंपरा सूँ होवती आई। बंगाल रै किसान पांत अठा रै किसान नै इण खेती में तिगुणौ नफौ हौ। बंगाल में इण खेती माथै सरकारी नियंत्रण हौ, जिणसूँ अठै माळवा में आ खेती घणी फूली-फळी। १९वीं सदी में अमल रौ वौपार करण सारू राजस्थान सूँ हजारू वौपारी माळवै पूगग्या। औ लोग किसानां नै खेती सारू करजौ देवता अर अमल रौ वौपार ई करता। होळै-होळै अमल रै वौपार रौ विस्तार गंगा री घाटी अर बंगाल-बिहार ताई होयग्यौ। इण रौ निर्यात होवण लाग्यौ। इण छेत्र में घणकरी मारवाड़ी फर्मा इज काम करती। १९वीं सदी रै चौथे दशक में फरूखाबाद अर मिरजापुर री अक सुप्रसिद्ध फर्म सेवाराम रामरिखदास रै बही-खाता सूँ ठा पड़ै क वा अमल रौ ई धंधौ करती।

उत्तरी भारत में खुरजा, हापुड़, हाथरस,

फिरोजाबाद अर मिरजापुर इत्याद नगर जिकौ अनाज री प्रमुख मंडियां ही, १९वीं सदी ताई सगळी राजस्थानियां रै कब्जै में आयगी ही। सरुपांत में अटै वां नै पंजाबी खत्रियां सूं करडौ मुकाबलौ करणौ पडियौ, पण सेवट सिक्कौ इणां रौ जम्यौ।

इण सगळी सफळता रै लारै राजस्थानी वौपारियां री मैणत हिम्मत अर धंधे रै प्रति लगन काम करै ही। राजस्थानी में अेक कहावत मशहूर है के— 'इंसान सौ कोस जावै तौ ई उणनै आपरै घर रौ खुणौ दीसै।' बंबई अर कलकत्तै जिसी महानगरियां में जाय ई अै लोग मरुस्थळ रै काळै कैरां अर सूखै खेजड़ां नै भूल्या कोनी। बंबई री चौपाटी अर कलकत्तै री चौरंगी माथै घूमतां थकां ई आपरी धोरा-धरती याद रह्यौ। इण वास्तै कमाई रै सागै मितव्यता बरत 'र इण लोगां' कूकौ खायनै कण रौ संचय कियौ। राजस्थान चरित्र रौ औ सै सूं मोटौ गुण है, जिणरै कारण समाज कमाई करनै कीं पईसा बचाय सक्यौ।

बीसवीं सदी री सरुआत में राजस्थान सूं प्रवास रौ सिलसिलौ कितरौ तेज रह्यौ, इणरी जाणकारी जणगणना रा आंकड़ा सूं मिळै। १९०१ री जनगणना मुजब उण वखत बंबई नगर री कुल जनसंख्या दस लाख ही, जिणमें अेक लाख पचास हजार वौपारी हा। वौपारियां में १३ हजार प्रवासी राजस्थानी हा जिका खासकर क्राफेड मार्केट, भूलेश्वर छेत्र अर कालबादेवी रोड माथै बसियोड़ा हा। इण १३ हजार में सूं २ हजार उदयपुर रा, १ हजार बीकानेर रा, ७ हजार पांच सौ जोधपुर रा अर १ सौ जैपुर रियासत रा हा। इण आंकड़ां सूं इण बात री ई जाण पडै के उण बगत बंबई पूगणिया प्रवासी किण-किण धंधा में लाग्या।

इणी'ज भांत सरुपांत री जाणकारी मुजब कलकत्तै में १८१३ में राजस्थानी प्रवासियां री कुल संख्या फगत ८० ही, जिकी बीस बरसां पछै ६०० हुई। १८९१ अर १९११ रै बिचाळै आ संख्या बधती-बधती २५ हजार ताई पूगगी। इण तरै आ बात सिद्ध होवै के ज्यू-ज्यू वखत बदळतौ गयौ अर आवण-जावण रा साधन सुधरता गया, राजस्थान सूं वत्तै सूं वत्ता प्रवासी दूजै प्रांतां में जावता रह्या।

धंधैवाडी रै हिसाब सूं इण सगळां सरुपांत में आपरी हैसियत मुजब नेनी- मोटी दुकानदारियां अर ब्याज माथै रकम देवण रौ काम सरु कर्यौ। इणरै पछै दलाली अर आदत रौ धंधौ पकडियौ।



होळै-होळै भागीदारी सूं मोटा धंधा में हाथ घाल्यौ अर सेवट उद्योग रै छेत्र में पूंजी लगायनै उद्योगपति बणग्या। पण इण प्रक्रिया सूं गुजरता वां नै जिकौ अनुभव हुयौ, अर बीच में आयोड़ी अबखाइयां रौ जिण भांत उणां मुकाबलौ करियां उणरी चरचा विस्तार सूं होवणी जरूरी है।

वौपार सूं उद्योग रै छेत्र में

पैलै विश्व जुद्ध ताई राजस्थानी प्रवासी उद्योग रै छेत्र में हरावळ में नीं हा। केई फर्मा आयात-निर्यात में आपरा पण आछी तरियां जमा लिया हा। पण उद्योग रै छेत्र में राजस्थानियां रौ प्रवेस जुद्ध री वखत अर बाद में ई हुयौ। १९०६ में कलकत्तै बंदरगाह सूं जितरौ सूती कपडौ आयात होवतौ, उण में भारतीय वौपारियां रौ हिस्सौ फगत दस प्रतिशत हौ। पण १९२८ ताई औ हिस्सौ पचास प्रतिशत रै लगैतगै पूग्यौ। १९१७ में बिड़ला बंधुवां सै सूं पैली पटसन रै निर्यात वास्तै लंदन में आपरौ ऑफिस खोल्यौ। इण पछै केई राजस्थानी पटसन उद्योग रै छेत्र में आया अर सफळ हुया।

औद्योगिक जगत मांय राजस्थानियां जिकी सफळता हासल करी, उणां रौ घणकरी जस उणां रै पैतृक गुणां अर आरथिक कारणां नै जावै। यूं तौ संयुक्त परिवार प्रणाली औद्योगिक विकास रै मारग मांय अडचनां पैदा करै, पण राजस्थानियां नै वौपार में नीं सिरफ स्हारौ दियौ, बलकै उणां उणां नै आपरी पूंजी रै विस्तार में ई मदद मिली। दरअसल संयुक्त परिवार प्रणाली सूं वौपार सारू जिण सहायक लोगां री जरूरत पडती, उणां नै वै आपरै परिवार मांय ई मिल जावता। इणरै अलावा इणसू उणां नै जरूरी पूंजी निवेश अर पारिवारिक वौपार विस्तार में मदद मिलती। साथै ई घर-परिवार री चिंता सूं ई मुगत रैवता। पैतृक गुणां रै कारण इज उणां री व्यवसाय माथै पकड़ मजबूत हुयी अर प्रगति रौ मारग प्रशस्त हुयौ।

अक्टूबर २०१७/माणक/११

केई राजस्थानी फर्मा जावा सूं खांड अर जापान सूं सीमेंट रै आयात रौ काम करण लागी अर विदेशी फर्मा नै मात देयदी।

पैलै विश्वजुद्ध री वखत सरकारी सहायता रै कारण भारत रै औद्योगिकरण नै टेकौ मिळ्यौ। पूरबी भारत में पैलड़ीवार इसै उद्योगां री थरपणा हुयी, जिणां रा मालिक भारतीय अर खासकर प्रवासी राजस्थानी हा। औद्योगिकरण रौ औ विस्तार कोई संजोग मात्र नीं हौ। इणरौ प्रमुख कारण जापानी कपडै रै आयात सागै पटसन अर सूत री दिनौदिन बधती मांग ही। इणसू राजस्थानी फर्मा नै आछौ चांस मिळ्यौ अर वां री स्थिति मजबूत होयगी। इण फर्मा में केशोराय पोद्दार अर बिड़ला री फर्मा प्रमुख ही। १९११ में जापानी कपडै रौ भारत में आयात करण वाळी पैली फर्म बिड़ला री ई ही।

यूं सरुपांत में बंबई में कपड़ा मिलां री थरपणा गुजरातियां अर पारसियां रै हाथ सूं हुई। पारसियां में टाटा परिवार भारत में बिजळी, इस्पात अर वनस्पति उद्योगां री सरुआत करी। पण इणसू ई पैली अेक प्रमुख राजस्थानी प्रवासी राजा गोविंदलाल पिती १८७० में दो कपडै री मिलां खरीद ली ही। दूजा राजस्थानी कपड़ा उद्योग में १९३०-३१ रै बीच में आया। बंबई में करीम भाई पेटिट री केई मिलां जद फैल होयगी तौ घणकरी राजस्थानी प्रवासियां खरीदली। इणरै अलावा कलकत्तै री केई कपड़ा मिलां ई राजस्थानियां रै हाथां आयगी। बीसवीं सदी रै चौथै दशक ताई देश में कपडै री प्रमुख मिलां में सूं तीस प्रवासी राजस्थानियां रै कब्जै ही।

देस में टाटा रै बाद बिड़लाज सै सूं मोटा उद्योगपति गिणीजता। इणां आपरी पैलड़ी जूट मिल १९१९ में कलकत्तै में खोली ही। इणी'ज बरस इंदौर रै प्रमुख बैंकर सर सरूपचंद हुकमचंद ई कलकत्तै रै कनै अेक मोटी पटसन मिल सरु करी ही। इणी'ज भांत फर्म सूरजमल नागरमल रै संस्थापक सूरजमल जालान १९२७-२८ में अर अफीम रै प्रमुख सटोरियै हरिदत्त चामडियै री फर्म ई पटसन मिलां री सरुआत करी।

कलकत्तै में यहूदी अर अमेरिकन उद्योगपतियां री मुकाबलौ करण वाळा राजस्थानी प्रवासी ई हा। इण लोगां जिकी पटसन मिलां सरु करी, वै देश री प्रमुख पटसन मिलां ही। बिड़ला बंधुवां दिल्ली में १९२० में अेक कपडै री मिल थापित करी अर १९२२ में इंदौर में भंडारी बंधुवां ई अेक कपड़ा मिल सरु करी। इणी'ज भांत पूरै

मध्य भारत में केई ठौड़ राजस्थानियां री कपड़ा मिलां काम करै ही। वख्र उद्योग रै अलावा केई प्रवासी बंधुवां कोयलै अर चाय बागान रै छेत्र में ई प्रवेस कियौ अर १९२० रै बाद केई कोयला खानां अर चाय बागान खरीद लिया।

दूजै उद्योगां रै ज्यू खंडसारी उद्योग कानी राजस्थानियां रौ ध्यान १९३२ में गयो। इण वखत तांई सरकारी नीति रै कारण केई चीणी मिलां री थरपणा होयगी ही। १९३२ में बिड़ला बंधुवां तीन अर डालमिया कंपनी अेक चीणी मिल सरू करी। सेक्सरिया बंधु बंबई रै कपड़ा उद्योग में आगीवाण हा, उणां अर खेतानां ई केई चीणी मिलां सरू करी। रामकृष्ण डालमिया सिमेंट उद्योग में प्रमुख बणग्या अर इणीज भांत केई राजस्थानियां उद्योग रै न्यारा-न्यारा छेत्र में आय र सफळता पाई।

आ सरूपांत री स्थिति है जद प्रवासी राजस्थानियां उद्योग रै छेत्र में आपरा पग रोप्या ई हा। उपरै पछै तौ उणां इण छेत्र में कितरी तरक्की करी, वा कोई सू छानी कोनी। खासकर आजादी मिल्यां पछै राजस्थानियां उद्योग रै छेत्र में जिकौ काम करियौ, वौ घणौ सरावणजोग है। कोई पण कौम री कीमत उपरै कामां सू ई होवै। जिकौ जैविक गुण राजस्थानी प्रवासियां रै खून में है, वौ इण धरती री कीरत नै उजागर करै।

नैनी-मोटी दुकानदारी सू बडै-बडै औद्योगिक प्रतिष्ठानां तांई पूगण री इण जात्रा में मैणत, हिम्मत, लगन अर सूझ-बूझ री जरूरत होवणी तौ पैली बात ही, इणरै अलावा प्रवासी समाज बारै जाय र जिण ढंग सू हिळमिळ नै रह्यौ, अेक दूजै री मदद करी अर संगठित रूप सू आगै बढ्यौ, वा घणी सरावणजोग बात है। अेक-दो प्रामाणिक उदाहरणां सू इण बात री पुष्टि होय जासी।

सेठ नाथूराम सराफ मंडावा (शेखावाटी) रा वासी हा, जिणां सरूपांत में कलकत्तै आय र मुनीम रै रूप में काम करियौ। धीरै-धीरै आपरौ खुद रौ नेनौ-मोटौ धंधौ सरू करियौ, जिणमें वां नै आछी सफळता मिळी अर वै लूंठा पूंजीपति बणग्या। वारै बारै में अेक जाणकार लिख्यौ है—

“सेठ नाथूराम रै मन में आपरी बिरादरी रै प्रति घणी सहानुभूति ही। उणां प्रवासी राजस्थानियां वास्तै चित्तपुर रोड रै नाकै माथै अेक वासौ (लॉजिंग-बोर्डिंग) खोल राख्यौ हौ, जटै वै आराम सू रैय सकै हा। उणां आपरै गांव मंडावा अर शेखावाटी छेत्र सू केई रिस्तेदारां अर ओळखीता नै कलकत्तै बुलाया अर वारी हर तरै सू

देश भर मांय राजस्थानी व्यवसायियां री साख है अर अमूमन औ कैयौ जावै के सिद्धांतां रा धणी मारवाड़ी वौपारी आपरै उसूलां रा पक्का हुवै। दरअसल मारवाड़ी व्यवसायी वौपार-व्यवसाय में नैतिक मूल्यां रौ ध्यान राखता आया है। रिणां रै भुगतान रै संबंध में वै ईमानदारी बरतता आया है। बुजुरगां री मान्यता है के — ‘बाणिया कौ हर समै ध्यान रवै मान कौ, मान ही जातौ रवै तौ धन रयौ किण काम कौ!’ राजस्थानियां री हमेस आ कोसिस रैवै के व्यवसाय में ईमानदारी अर सच्चाई हुवै। देस मांय इण तरै री स्वैच्छिक व्यवस्था करण वाळी आ पैलपरथम व्यावसायिक जाति रैयी। इण व्यवस्था बाबत मैक्स वेबर कैयौ के — “मारवाड़ी जैनी लेन-देन में भरोसे अर सच्चाई रै कारण आपरी ईमानदारी वास्तै चावा है!”

मदद करनै पगां माथै करिया। कलकत्तै री सूतापट्टी छेत्र में आज ई मंडावा री मोकळी दुकानां है, जिणरौ अेक मात्र कारण सेठ नाथूराम है।”

इणी 'ज भांत सेठ सूरजमल झुणझुणवाळा ई कलकत्तै में आपरी तरफ सू अेक वासौ खोल राख्यौ हौ, जटै प्रवासी राजस्थानी मुफत में जीम सकै हा। सेठ सूरजमल खुद आपरै सुसरै प्रेमसुखदास कायां री मदद सू कलकत्तै आय र बिणज वौपार सरू करियौ हौ। प्रेमसुखदास ई १९वीं सदी रै चौथै दशक में रामगढ रै जुगलकिशोर रुइया री मदद सू कलकत्तै आया हा। इण भांत तुळसी सेती हरडमत मिळ्या अर हडमत सेती राम। राजस्थानवासियां में अेक दूजै री मदद करनै उणनै आगै बढावण रौ अर हिळमिळ नै संगठित रूप सू जिकौ नामी गुण है, इणसू अै लिछमी रा लाडेसर बिना कोई भेदभाव रै अेक दूजै री मदद सू बिणज-वौपार में आगै बढता गया। सो बिणज-वौपार रै विकास में इणां री जातीय भावना ई मैतवपूरण भूमिका निभाई।



अक्टूबर २०१७/माणक/१२

समाजसेवा, धरम अर राजनीति रै छेत्र में

राजस्थानवासियां रै चरित्र में अेक गुण औरू उल्लेखजोग है के वै कमावणौ जाणै तौ उणनै पाछौ खरच करणौ ई जाणै। आज राजस्थानियां रा सैकडू कांई हजरू चेरिटेबल ट्रस्ट बण्योडा है जिका मानव कल्याण खातर खुलै हाथ सू खरच करै। राजस्थानवासियां री निवेश करियोडी मूधी कमाई रै पाण आज देश में इसी मोकळी संस्थावां है जिकी शिक्षा, चिकित्सा अर समाजसेवा रै छेत्र में काम करै अर हर बरस करोडां रुपिया खरच करै। ‘मारवाड़ी रिलीफ सोसायटी’ जिसी अेकली संस्था रौ सालीणौ बजट लाखां रुपियां रौ हौ। पूरै देश में मिंदरां, तीरथां, धरमसाळावां अर पुन खतै जितरौ पईसौ आं लिछमी रा लाडेसर राजस्थानियां समाज रौ लाग्योडौ है, उतरौ किणी रौ ई कोनी। राजस्थानी परिवारां रा बणायोडा मिंदर तौ कला-कौशल अर स्थापत्य री निजर सू संसार री अमोलक चीजां है, जिकी देखियां ई बण आवै। इणी 'ज भांत विद्यालय, अस्पताल अर दूजी मानवोपयोगी संस्थावां रौ तौ छेह ई कोनी जिकी आं लाडेसरां री मदद सू चालै।

सही बात आ के समाजसेवा रै छेत्र में राजस्थानवासियां रौ कोई मुकाबलौ ई नीं। बिड़ला, बांगड़, बजाज, साहू जैन, सिंघानिया, रुइया, मोदी, पोद्दार, हिम्मतसिंहका, मालपाणी, डालमिया, राजगढिया, नवलगढिया, केडिया, टाटिया इत्याद अणगिणत इसा परिवार है ज्यां रौ इण छेत्र में गजब रौ योगदान है अर तारीफ री बात आ के वौ निरंतर बधतौ जाय रह्यौ है।

इटली रै रणखेत थरमोपोली रा राजस्थान सू तुलना करतां अेक कवि साव साची कहयी के इटली में तौ फगत अेक थरमोपोली है अर राजस्थान री पावन धरा माथै तौ ठौड़-ठौड़ थरमोपोलियां बिखरी पड़ी है। अटै हर गांव-गळी घमसाण हुया। जुग-जुग में आगीवाण हुया। इणी 'ज भांत अटै गांव-गांव अर घर-घर में भामाशाह रा वंशज भर्या पडूया है जिकौ अवसर आयां आपरै जीवण भर री मैणत री कमाई आछे काम सारू निछरावळ करतां अंगां ई जेज नीं लगावै।

समाजसेवा अर धरम रा छेत्र रै ज्यू राजनीति रा छेत्र में ई राजस्थानी लाडेसरां रौ योगदान कम कोनी रह्यौ। इणी 'ज लेख सागै बाक्स मैटर में दियोडै फगत अेक बंगाल रै उदाहरणां सू इण बात री पुष्टि भली भांत होय जावै। भारतीय राष्ट्रीय

कांग्रेस ने आर्थिक मदद देयने पगां करण रौ प्रमुख श्रेय प्रवासी राजस्थानियां नै ई है। सेठ जमनालाल बजाज, घनश्यामदास बिड़ला अर प्रभुदयाल हिम्मतसिंहका जिसा नरपुंगव तौ कांग्रेस रा प्रमुख थंभ रहया। इणां रै पाण ई महात्मा गांधी राष्ट्रव्यापी आंदोलन नै गतिशील कर पाया। कांग्रेस रा सगळा प्रमुख फैसला राजस्थानियां री इमारतां हेठळ ई हुया अर गांधीजी तौ शरीर ई उठै ई छोड़्यौ।

राष्ट्रीय आंदोलन में सक्रिय रूप सूं भाग लेवण वाळै राजस्थानी लाडेसरां री सूची घणी लांबी है। सगळों रा नांव गिणावणा तौ इण आलेख में संभव कोनी, छतांपण की प्रमुख नाव इण भांत है—

सरबश्री जुगलकिशोर बिड़ला, कमलापत सिंघानिया जमनालाल बजाज, घनश्यामदास बिड़ला, श्रीकृष्णदास जाजू, डॉ. राममनोहर लोहिया, प्रभुदयाल हिम्मतसिंहका, लाला श्यामलाल, श्रीमती चंद्रबाई, शिवदास डागा, जमनालाल चौपड़ा, सुगनचंद लुणावत, शुकदेव अग्रवाळ, बैजनाथ केडिया, हनुमानप्रसाद पोद्दार, पूनमचंद रांका, चांपादेवी भारूका, महादेवी केजड़ीवाळ, मगनलाल बागड़ी, गोविंददास मालपाणी, ब्रजलाल बियाणी, सीताराम सेकसरिया, साहू शांतिप्रसाद, आनंदीलाल पोद्दार, बसंतलाल मुरारका, ईश्वरदास जालान, हीरालाल लोहिया इत्याद।

देश रै आर्थिक अर औद्योगिक विकास में प्रवासी राजस्थानी लाडेसरां रौ योगदान तौ जगजाहिर। राजस्थानी परिवारां देस रै आर्थिक विकास सारू जिकौ काम करियौ उणरौ लेखौ जोखौ होवणौ हाल बाकी है। इण परिवारां आपरै नांव सागै मायडभोम रा नांव नै ई उजागर कर दियौ। नवलगढ सूं गयोडौ 'नवलगढिया' बाज्या तौ राजगढ सूं उद्योडा 'राजगढिया'। लोह रौ वौपार करियौ तौ इसौ डंकौ बजायौ के खुद 'लोहिया' बाजण लागा अर रुई रै धंधे में घुस्या तौ इसी धाक जमाई के खुद ई 'रुइया' बणग्या। कपडै रौ धंधौ करनै बजाज पीढियां रै वास्तै 'बजाज' बणग्या तौ रंग रौ धंधौ करनै सदा सर्वदा खातर 'रंगवाळा' होयग्या।

कला-कौशल अर स्थापत्य रे छेत्र में

राजस्थान कला कौशल रौ भंडार गिणीजै। अठै री विविध कलावां संसार रै खूणै-खूणै में चावी। इण कारण दुनिया रा हर खूणै सूं हर वर्ग रा यात्री अठै री कलावां नै देखण सारू आवै। निरत,



संगीत अर वास्तुकला सूं लगायनै स्थापत्य कला तांई रै हर छेत्र में राजस्थान रौ कोई जोड़ कोनी। इणरी आपरी ओळखाण अर मटोट न्यारी।

खासकर अठै री स्थापत्य कला तौ सगळै संसार में चावी-ठावी। आ परंपरा घणी लूठी अर सरावणजोग। राजस्थान रा लिछमीपतियां आपरा अखूट खजाना इण कला रै नांव माथै निछरावळ कर नांख्या।

देलवाडै री परंपरा में भारत रै खूणै-खूणै में राजस्थानवासियां मिंदरां रौ निरंतर निरमाण करायौ। आज देश में ठौड़-ठौड़ बिड़ला, बांगड़, सोमानी, सिंघानिया अर दूजा केई धर्म प्रेमी लाडेसरां रा बणायोडा आं मिंदरां री अेक लूठी शृंखला है। अेक सूं अेक भव्य मिंदर है जिणां में सूं घणकरा वैष्णव अर कीं जैन मिंदर है। जैन मिंदरां में ई घणकरौ पड़सौ राजस्थानी लाडेसरां लगायौ है। आजादी पछै रा दशकां में बणियोडा मिंदरां में कानपुर में सिंघानिया परिवार रौ बणायोडौ राधाकृष्ण मिंदर तौ स्थापत्य कला रौ

आज च्यारूंमेर लोगां रै मनां मांय औ सवाल उठै के अैड़ा कुण-सा गुण है, जिणां री वजै सूं मारवाड़ी घराणा वौपार अर उद्योग मांय आगीवाण बणया अर वै देस-दुनिया रै खूणै-खूणै पूग र सफळतावां हासल करी अर जस कमायौ? तौ सार रूप में औ कैयौ जाय सके के राजस्थान रा लिछमी-पुत्र आदरसां रौ अनुकरण करै जिणां में सामाजिक संगठन, जातीय भावना, संयुक्त परिवार प्रणाली, धारमिक भावना, लोक-कल्याण, व्यावहारिक प्रशिक्षण, मितव्ययता, वौपारिक प्रतिभा, व्यावसायिक नैतिकता, विकास भावना, हुंडी, बीमौ, साझेदारी साख, राजनैतिक समरथन, सांस्कृतिक समायोजन इत्याद है। आं सब रै बळ माथै वै आखै देश रा ई नीं विदेशी बजारां मांय खास अर मैतवपूरण स्थान बणाय लियौ है।

अेक बेजोड़ नमूनी है।

राजस्थान कला रै छेत्र में सदीव हरावळ में रह्यौ। इणरौ मोटौ कारण औ के अठै मैणत सूं कमायोडी लिछमी कला रै वास्तै खुलै हाथां खरच होवती रहयी अर इण भांत कला-कौशल अर स्थापत्य रै छेत्र में राजस्थानी लाडेसरां रौ लूठौ योगदान रह्यौ।

औद्योगिक घराणां री नुंवी पीढी अर राजस्थानीपणौ

वखत रौ वायरौ बडौ प्रबळ गिणीजै। फेरूं इण वैज्ञानिक जुग में मौजूदा बीस-तीस बरसां में जिण झड़प अर तेजी सागै पूरै मानव समाज में बदळाव आयौ, वौ लारलै सौ पचास बरसां में ई कोनी आयौ। इणरौ असर राजस्थान री नुंवी पीढी माथै ई पड़्यौ। इणसूं आज हालत आ बणगी के खासकर औद्योगिक घराणां री नुंवी पीढी में 'राजस्थानीपणौ' कम होवतौ जाय रह्यौ है। घनश्यामदासजी बिड़ला जटा तांई मौजूद हा, वै आपरै संस्थानां में पक्की परख करियां पछै बेसी सूं बेसी राजस्थानियां नै ई राखता अर वां रै सागै बात बतळावण राजस्थानी भाषा में ई करता। इणसूं भावनात्मक संबंध, विस्वास, निष्ठा अपणापौ बण्यौ रैवतौ अर राजस्थानियां रै खून में मिळ्योडै चारित्रिक गुणां रौ संस्थानां नै लाभ मिळतौ, जिणसूं वै फूलता-फळता। भाषा संस्कृति री वाहक गिणीजै, इण कारण जे नुंवी पीढी आथूणै रंग में रंगीज र आपरी बुनियाद नै भूलगी तौ वा घाटै में रहसी। आ बात सही के नुंवौ सै कीं खराब कोनी अर पुराणौ सै कीं आछौ कोनी। पण विवेक सूं विचार करां तौ नुंवै री चमक-दमक में पुराणी आछी बातां नै भूलण रौ खतरौ बेसी है। क्यूंके नुंवी पीढी नै आ बात गांठ बांधणी पड़सी के जे वारौ 'राजस्थानीपणौ' खतम होयग्यौ तौ सै कीं खतम हुय जासी। लिछमी रा लाडेसर इण समाज कनै खुद री जडां हरावळ में रैवणी जरूरी है।

देश री मौजूदा राजनैतिक अर सामाजिक परिस्थितियां नै देखतां सगळै प्रवासी राजस्थानियां नै संगठित करणौ घणौ जरूरी। आं नै संगठित करियां देस री अखंडता नै बळ मिळसी अर रोजगारपरक चहुंमुखी विकास होसी कारण के राजस्थानी समाज मूळ रूप सूं पक्कौ राष्ट्रवादी, शांतिप्रिय अर कठोर परिश्रमी है।

जी-८, मुल्तान कुंज, भगत री कोठी अेक्सपेंशन
जोधपुर-३४२००५

स्वतंत्रता आंदोलन नै मारवाड़ी लाडेसरां रौ योगदान

— डॉ. गिरिजाशंकर शर्मा

भारतीय स्वाधीनता आंदोलन रै इतिहास री जांच-पड़ताळ करां तौ आ बात उजागर होवै के भारत नै स्वतंत्र करावण में तौ संपूर्ण भारतीय समाज रौ योगदान रह्यौ है, पण राजस्थान रौ वौपारी वर्ग जिकौ पूरे देश में 'मारवाड़ी समाज' रै नांव सूं ओळखीजै, उणरौ स्वाधीनता संग्राम में कितरौ जबरदस्त योगदान रह्यौ, औ फगत अकलै बंगाल रै उदाहरण सूं ई स्पष्ट होय जावै। बंगाल-आसाम में उण वखत घणकरौ मारवाड़ी समाज विणज-वौपार में लागियोडौ हौ अर वीं रै बाबत आ आम धारणा ही के इण समाज नै आपरै धंधेवाड़ी सूं मतळब है, वौ

कोई दूजै पड़पंच में नीं पड़ै। पण मारवाड़ी समाज खतरौ झेलता थकां स्वाधीनता आंदोलन में जिकौ जबरौ योगदान दियौ, वौ शोध सूं ई ठा पड़ै।

बंगाल ठेट सूं ई स्वाधीनता आंदोलन रौ गढ रह्यौ। लार्ड कर्जन री बंग-भंग घोषणा रै पछै १९०६ में कलकत्तै में भारतीय राष्ट्रीय कांग्रेस रौ अधिवेशन हुयौ। इण में पैलडीवार स्वराज्य प्राप्ति रै लक्ष्य री घोषणा करीजी। राष्ट्रीय भावना सूं प्रेरित होयनै बंगाल रा निरा ई राजस्थानी प्रवासियां इण सम्मेलन में सदस्य रूप में भाग लियौ, इण अधिवेशन में गरमदळ

राजस्थानी लाडेसरां रा लूंडा शताब्दी पुरुष हा प्रभुदयालजी हिम्मतसिंहका

श्री प्रभुदयालजी हिम्मतसिंहका राजस्थानी लाडेसरां री जूनी पीढी रा लूंडा प्रतीक रैया। आज सूं लगेटौ अक सौ अस्सी बरसां पैली आपरा पिताश्री रामरिखदासजी खेतडी राज रै सिहाणा गांव सूं रवानै होयनै कमाई खातर भारत रै पूर्वांचल में ठेट संधाल परगनै रै दुमका में पूगिया। अठै ई प्रभुदयालजी रौ 16 अगस्त, 1889 नै जनम हुयौ। आपरी शिक्षा-दीक्षा भागलपुर, पटना अर कलकत्तै में हुई। विद्यार्थी जीवण में ई आप राष्ट्रीय विचारधारा सूं प्रभावित होयनै स्वाधीनता संग्राम सूं जुड़ग्या। बंगाल ठेट सूं क्रांतिकारियां रौ गढ रह्यौ। प्रभुदयालजी क्रांतिकारियां रै संपर्क में आया अर कलकत्तै रै रोडा कांड में पकड़ीजग्या। इणरै पछै तौ आपरौ जीवण देश अर समाज नै ई समरपित रह्यौ। केई समाजोपयोगी संस्थावां री थरपणा करी अर गांधीजी सूं लगायनै सुभाष बोस अर राममनोहर लोहिया तकात रा आप विसवासपात्र रह्या। सरदार पटेल री तौ आपरै माथै पूरी मेहरबानी रैया। देश में कठैई पण निष्पक्ष जांच रौ काम पड़तौ, सरदार प्रभुदयालजी नै सूपता। १९३७ में आप बंगाल विधानसभा रा सदस्य निर्वाचित हुया। सो १९४८ ताई कायम रह्या अर इणरै पछै संविधान सभा रै सदस्य रूप में काम करता रह्या। बरस १९४६ में ब्रिटिश सरकार भारत पाकिस्तान सीमा निर्धारण सारू रेडक्लिप री अध्यक्षता में जिकौ अक सदस्यीय न्यायाधिकरण बणायौ, उण रै सामी आसाम सरकार कानी सूं हिम्मतसिंहकाजी सोलीसीटर रै रूप में बहस करी। वां री इण बहस रै पाण ई सिलहट रौ हिंदू बाहुल्य इलाकौ आसाम नै दिरीजियौ अर बाकी रौ पाकिस्तान नै। सरदार पटेल रै आदेस सूं बरस १९४९ में शंकरराव देव आयोग री अध्यक्षता में गठित त्रिसदस्यीय आयोग रा अक सदस्य हिम्मतसिंहका ई हा। इण आयोग नै औ निरणै करणौ हौ के भरतपुर, धौलपुर (तत्कालीन मत्स्य राज्य) छेत्र राजस्थान में मिलावणौ के उत्तर प्रदेश में। आयोग रा तीजा मेंबर श्री आर.के. सिंधवा हा। औ आयोग भरतपुर अर धौलपुर री यात्रावां करी अर हिम्मतसिंहका जी इण आयोग सामी बार-बार वठै रा गांवेडी लोगां नै गवाही सारू बुलावता अर वां री सांस्कृतिक अस्मिता, भाषा अर दूजी बातां सूं आयोग रा बाकी सदस्यां नै परिचै करावता। हिम्मतसिंहका जी री अथक कोसिसां रौ ई फळ हौ के आयोग आं छेत्रां नै राजस्थान में मिलावण री सिफारस करी। १९५६ सूं ६२ ताई आप राज्यसभा रा सदस्य रह्या अर इणरै पछै दस बरसां ताई लोकसभा में संधाल परगनै कानी सूं सदस्य रह्या। इण भांत प्रभुदयालजी रौ पूरौ जीवण समाजसेवा अर देस भगती नै समरपित रह्यौ। राजस्थानी जन मानस में अक विसवास प्रचलित है के पड़पोतै जनमियां मिनख सोनै री निसरणी रौ हकदार बणै। पण प्रभु कृपा सूं आप तौ लड़पोता-पोतियां नै रमायां पछै 102 बरस री उमर पूरी कर र १९९१ में सरग सिधायी।

रा नेतावां जिकौ उग्र विचार पेस किया अर राष्ट्रीय आंदोलन रौ सरूप निर्धारित कियौ, केई राजस्थानी वौपारियां नै वारा वै विचार समयोचित लागिया। इसै मारवाडियां में श्री प्रभुदयालजी हिम्मतसिंहका, हनुमानप्रसादजी पोद्दार, ज्वालाप्रसादजी कानोडिया, ओंकारमलजी सराफ, कन्हैयालालजी चितलंगिया इत्याद खास हा।

सन् १९२१ रै अडै-गडै गांधी युग आवण रै सागै आंदोलन सत्याग्रह अर असहयोग रौ मारग पकड़्यौ। बंगाल में ई असहयोग अर सविनय अवज्ञा आंदोलन जोर पकड़ण लाग्यौ। बंगालियां रै सागै राजस्थानी प्रवासियां खासकर शेखावटी, बीकानेर, जोधपुर अर उदैपुर रियासतां रा लाडेसरां आंदोलनां में दिल खोल रै भाग लियौ। इण काम में उणां भरपूर आर्थिक सहयोग तौ दियौ ई, इणरै अलावा आंदोलनां में सक्रिय रूप सूं भाग लेयनै जेळ यातनावां अर भांत-भांत रा फोड़ा ई भुगतिया।

बंगाल सरकार रै अक सुरक्षा अधिकारी मि. अ. अ. गजनवी सन् १९३० में आपरै अक गोपनीय कागद में भारत रै वायसराय रा प्रतिनिधि मि. कनिंघम (शिमला) नै लिखियौ के बंगाल में चालतै गांधी आंदोलन नै मारवाड़ी समाज री मदद बंद होय जावै तौ औ आंदोलन मतै ई खतम होय जावै। मि. गजनवी वायसराय नै दो सूचियां भेजी, जिणमें उण प्रवासियां रा नांव हा जिकौ स्वाधीनता आंदोलन में सक्रिय हा। इण शिकायत माथै केई लोग गिरफ्तार हुया अर वां रा बहीखाता जबत करीजिया। इसै लोगां में शेखावटी छेत्र रा सेठ श्रीकृष्ण सीताराम, बिहारीलाल गोपीराम, पदमचंद पन्नालाल, रामवल्लभ रामेश्वर, रामकृष्ण शिवचंद्रराम (बिसाऊ), राधाकृष्ण नेवटिया (नवलगढ), मंगतुराम जैपुरिया, गिरधारीलाल जवाहरमल, वल्लभदास भट्ट, शिवदयाल मदनगोपाल, श्रीनिवास पोद्दार, बालकिशन पोद्दार (रामगढ) अर सेठ गोविंदराम परसराम बजाज इत्याद खास हा।

इणां में सेठ राधाकृष्ण नेवटिया, मंगतुराम जैपुरिया अर गोविंदराम परसराम बजाज माथै तौ क्रांतिकारी आंदोलन सूं संबंधित होवण रौ आरोप हौ अर सेठ श्रीनिवास बालकिसन पोद्दार माथै १९२१ सूं ई स्वाधीनता आंदोलन में

आर्थिक मदद देवण रौ अर आपरै घर में उणरौ दफ्तर चलावण रौ आरोप हौ।

दूजोड़ी सूची में जिण राजस्थानी लाडेसरां रा नांव हा, वां नै गिरफ्तार तौ कोनी करिया, पण वां माथै ई औ खुल्लौ आरोप हौ के वै गांधीजी रै आंदोलनां में सक्रिय रूप सू भाग लेवै। इणमें घनश्यामदास बिड़ला (पिलानी), देवीप्रसाद दुर्गाप्रसाद खेतान (रामगढ), सीताराम सेकसरिया (रामगढ), रामकुमार जालान (रामगढ), हनुमान प्रसाद बगड़िया (रामगढ), भागीरथ कानोड़िया (रामगढ), लक्ष्मीनारायण खेमाणी (मंडावा), बैजनाथप्रसाद मोतीलाल देवड़ा (फतेहपुर), राधाकृष्ण चावसरिया (नवलगढ), रामकुमार के जड़ीवाल (चिड़ावा), आनंदीलाल पोद्दार (नवलगढ), दुर्गाप्रसाद सावसका (नवलगढ), सागरमल नाथानी (दूधावास, चूरू), मुन्नालाल ममूदी (मंडावा), मगनीराम रामकुमार बांगड़ (डीडवाना), हीरालाल नथमल भंवरलाल रामपुरिया (बीकानेर), भंवरलाल जौहरीमल वैद (चूरू) अर सागरमल वैद (चूरू) इत्याद रा नांव प्रमुख रूप सू हा।

इणां में सेठ रामचंद्र गुरुप्रताप पोद्दार माथै क्रांतिकारी आंदोलन में भाग लेवण रै सागै सविनय अवज्ञा आंदोलन में खुलमखुल्ला आर्थिक मदद देवण रौ आरोप हौ। सेठ रामकृष्ण डालमिया माथै आंदोलन सारू अेक लाख रुपियां री इमदाद देवण रौ आरोप हौ। दूधावास रा सेठ सागरमल नाथानी माथै तौ केई आरोप हा। आर्थिक मदद अर घर में दफ्तर चलावण रै अलावा उणां माथै औ ई आरोप हौ के वै हड़ताळां रा समर्थक हा अर खुद स्टॉक अेक्सचेंज रा सदस्य होवण रै नातै वै हड़ताल रौ विरोध करणिया अंगरेज वौपारियां नै वारै सागै वैपार नीं करण री धमकी देवता हा।

अंगरेज सरकार री निजरां में कीं वौपारी खास दोषी अर घणा खतरनाक हा वां री सूची न्यारी बणियोड़ी ही। इण लोगां में सेठ घनश्यामदास बिड़ला, रामकृष्ण डालमिया, मुन्नालाल मसूदी, राधाकृष्ण नेवटिया, मंगतराम जैपुरिया, श्रीनिवास बालकृष्ण पोद्दार, गोविंदराम परसराम बजाज, देवीप्रसाद दुर्गाप्रसाद खेतान, हनुमानप्रसाद बगड़िया, रामकुमार जालान, भागीरथ कानोड़िया अर

मिनखां री माया : रूखां री छाया

लिछमी रै लाडेसर राजस्थानी समाज नै कड़ी मैणत रै सागै दूरदर्शिता सू काम करण री जिकी प्रवृत्ति माटी री सौरम रूप में इण धरती सू मिळी वा इण संस्कृति री खास ओळखाण बणगी, उदाहरणसरूप स्व. घनश्यामदासजी बिड़ला रै आ राजस्थानी कैवत जबान चढियोड़ी ही— 'मिनखां री माया रूखां री छाया' अर मिनख रै ओळखण री वांनै जबर हथौटी ही। आपरै उद्योगां रौ संचालन करण वास्तै उणां जिण प्रबंधकां अर प्रशासकां रौ चुणाव करियो, वौ खरौ अर सही निवडियो। इण वास्तै उणां कदैई डिग्री-डिप्लोमा क आपसी संबंधां नै महत्त्व नीं दियो। वारी कसौटी माथै जिकौ खरौ उतरियो, उणनै अपणाय लियो।

बिड़लाजी रै हाथ सू टाळनै लियोड़ा रतनां री सूची खासी लांबी है, जिणमें सरब श्री देवीप्रसादजी खेतान, सीतारामजी खेमका, पारसनाथजी सिन्हा, शुकदेवजी पांडे, दुर्गाप्रसाद मंडेलिया, डेडराजजी मड़दा, मुरलीधरजी डालमिया, ताराचंदजी साबू, रामलालजी राजगढिया, आसकरणजी अग्रवाल, इंदु पारेख, रामनिवासजी साबूत, रामप्रसादजी पोद्दार इत्याद खास है।

बिड़लाजी आदमी री पारख किण भांत करतां उणरौ अेक दाखलौ इण भांत है— १९२४ में मुरलीधरजी डालमिया आपरै मामा ज्वालाप्रसादजी सागै नौकरी वास्तै बिड़लाजी सामी हाजर हुआ। वां री उमर १२ बरस री ही। बिड़लाजी बोल्या— “इण टाबर रै तौ हाल मूंडै रौ दूध ई कोनी सूख्यौ, इणरी उमर तौ हाल खेलण-खावण री है। इण रौ बेगौ ई इणनै नौकरी रै बंधण में ब्यूं नांखौ?” पण मामा रै आग्रह सू उणनै जूट मिल में स्टोर कीपर राख लियो। थोड़ाक दिनां में स्टोर कीपर री शिकायत हुयगी। बिड़लाजी जांच कराई तौ आ जाण पड़ी के सगळी गड़बड़ी पैली वाळै स्टोर कीपर री करियोड़ी ही, मुरलीधरजी रौ कोई दोष नीं हौ।

दो-तीन बरस काम करियां सू बिड़लाजी वारै काम सू घणा संतुष्ट हुआ अर वांनै तरक्की मिळती गई। १९३५ में जद बिड़ला कॉटन मिल, दिल्ली रै जनरल मैनेजर री कुरसी खाली हुई तौ लंदन सू बिड़लाजी तार भेजनै के मुरलीधरजी डालमिया रौ पोस्टिंग कर दियो जावै। उण वखत बिड़ला जूट मिल, कलकत्ता में मुरलीधरजी केजरीवाल अेक वरिष्ठ अधिकारी हा। इण कारण औ भ्रम हुयौ के केजरीवाल री ठौड़ डालमिया जिसा साधारण अधिकारी नै दिल्ली मिल री जनरल मैनेजरी किया सूपीज सकै? इण वास्तै लंदन तार भेजनै इणरी पूछताछ करीजी तौ पाछौ तार सू पडूतर आयौ— 'डालमिया रिपीट डालमिया, नेप्पू ऑफ ज्वालाप्रसाद।' पडूतर सू दूजा तौ कांई पण मुरलीधरजी डालमिया खुद चकित रैयग्या। पण बिड़लाजी रौ तौ सिद्धांत हो माया मिनखां री छीयां रूखां री।

बालचंद मोदी इत्याद रा नांव प्रमुख रूप सू हा। अै सगळा गांधीजी रा खास सहयोगी हा।

राजस्थान रा इण प्रवासी लाडेसरां नै स्वाधीनता आंदोलन सू विरत करण तांई अंगरेज सरकार घणी कोसिसां करी। इण सारू उणै भांत-भांत रा दंद-फंद करिया।

अंगरेज इण बात नै आछी तरियां जाणै हा के राजस्थान रौ औ वौपारी वर्ग ब्रिटिश भारत में विणज-वौपार करनै धन कमावै हौ, पण वां री वफादारी अंगरेजी सरकार सागै नीं होय'र आपरै मूळ वतन में रियासती रजवाड़ां सागै ही। कारण के वारी चल-अचल संपत्ति उठै ई सुरक्षित ही। अंगरेजी सरकार इण स्थिति रौ लाभ उठावतां देसी रजवाड़ां नै लिखणौ सरू करियो के वै इण प्रवासी राजस्थानियां माथै दबाव नांख'र स्वाधीनता आंदोलन सू विरत करै।

राजस्थानी लाडेसरां रौ स्वाधीनता आंदोलन में भाग लेवण रौ मूळ कारण वारी देश भगती रै सागै देश रौ औद्योगिक हित पण ई हौ। विदेशी पूंजीवाद रौ पोषक ब्रिटिश साम्राज्यवाद उगतोड़ा आं भारतीय उद्यमियां रै हाथां अठै रै औद्योगिक विकास में मोटौ रोड़ौ हौ। दोनू रा हित अेक दूजै सू विपरीत हा। इण कारण ई राजस्थानी प्रवासियां राष्ट्रीय जन आंदोलन में सक्रिय रूप सू भाग लियो।

लिछमी रा लाडेसर राजस्थानी समाज रौ औ त्याग, देश-प्रेम कदैई नीं भुलाई सकै। पण आ बात घणी अटपटी लागै के स्वाधीनता आंदोलन में इत्तौ जबरदस्त योगदान होवता थकां ई नुंवी पीढी नै इण री कोई जाणकारी कोनी। राजस्थान री पाठ्य पुस्तकां में इणनै कठैई ठौड़ कोनी। इण कानी ऊंडाई सू सोचीजणौ चाइजै। ■